



# Bafana labahlakaniphile



**Leah Sapi**



Insimbi yesikolo iyakhala. Letsa naTseMba  
bagijima kakhulu, baya esikolweni





Sifundvo salamuhla simayelana nengadze yetibhidvo.

Letsa naTsema bacoca ngekucala ingadze yetibhidvo.


Bavumelana ngekuhlanyela sipinishi.



NgeMgcibelo bamangata mkhulu ngekuvuka  
ekuseni kakhulu.

Batsatsa imali mkhulu layigcinile.

Bagijima baya esitolo kuyewutsenga  
liphakethe lembewu yesipinishi.





Letsa naTsema batsatsa sitja lesidzala,  
basigcwalisa ngemhlabu nemcuba.

Base bafaka imbewu yesipinishi. Banisela  
lembewu onkhe emalanga. Ngemuva  
kwemalanga lasitfupha, imbewu yacala  
kumila. Bavala sitja ngenethi kute bavikele  
imbewu etinyonini.



Labafana babuka indzawo yekwenta  
ingadze.

Bahlobisa indzawo, bafaka umcuba  
bahlanganisa nemhlaba. Benta imisele  
banisela umhlaba.





Ngemuva kwemaviki lamabili, imbewu  
beseyikhule ngalokwanele. Bayikhapha  
esitjeni, bayihlanyela emiseleni. Banisela  
ingadze onkhe emalanga ntsambama.



Letsa naTsema, bebanenkhinga yetinyoni  
lebetidla titjalo tabo.

Bebadlala dvute nengadze kute bacoshe  
tinyoni.

Uma baye esikolweni, tinyoni betitfolia litfuba  
lekudla titjalo tabo.





Letsa naTsema bacela seluleko kumkhulu  
wabo.

Balulekwa ngekutsi bente sitfusatinyoni.

Basebentisa tindvuku letimbili kwenta  
siphambano. Batibopha ngentsambo.



Tsemba naLetsa bagcokisa lesiphambano imphahla yekusebenta, sigcoko nemahhudlu. Base babeka lesitfusatinyoni engadzeni. Uma umoya uvunguta, imikhono yalemphahla yekusebenta beyiya phansi nasetulu. Tinyoni tacabanga kutsi ngumuntfu loticoshako, taphapha tahamba.





Letsa naTsema babonga mkhulu  
ngekubeluleka. Badvumisa sitfusatinyoni  
sabo.

Batjela bangani babo ngesitfusatinyoni.

Nyalo sebatawudlala ngaphandle  
kwekwesaba.



Bafana bacinisekisa kutsi kute luhula engadzeni yabo. Basusa tonkhe titjalo lebetimila engadzeni yabo.





Ingadze yabo beyiyihle kakhulu.

Sipinishi besiluhlata.

Besidvonsa emehlo ebantfu labandlulako.



Letsa akawuvali umlomo ngesipinishi sabo.

“Kungani utsandze sipinishi kangaka?”  
kubuta Tsembo.

“Sipinishi siyilungele imitimba yetfu.  
Sidzinga kudla tibhidvo kute sigcine imitimba  
yetfu iphilile,” kuphendvula Letsa.





“Tonkhe tibhidvo tilungele kugcina imitimba yetfu iphilile?” Tsemba uyachubeka uyabuta.

“Yebo, kepha tiyehluka ngekwetidlo letondla umtimba,” kuphendvula Letsa.



Letsa akamange agcine lapho. Wakhulum  
ngetidlo letahlukene letitfolakala esipinishini.

Emagremu lalikhulu esipinishi aphetse loku  
lokulandzelako:


Emanti - 91%

Emaphrotheni – 2.9g

Shukela - 0.4g

Emafutsa - 0.4g nalokunye.





Tsemba sewumangele kakhulu.

“Ulutsatsaphi lonkhe lolwati?”

“Ngifundza emabhuku lengiwatfola kumtapomabhuku futsi ngisebentise neGoogle elucingweni lwami.” Letsa kusamele achaze lokunyenti. “Utsi bewati kutsi sipinishi sinemavithamini nemaminerali lagcina imitimba yetfu iphilile?” kubuta Letsa.



Emavithamini lalandzelako atfolakala  
esipinishini:


Vithamini A- usita ngekubona

Vithamini C- usita emasotja emtimba

Vithamini K1- usita kuvala ingati uma wopha

Vithamini B9- ukhulisa ticubu temtimba





Ngemuva kwemaviki lasitfupha, sipinishi  
besesilungele kukhiwa.

Letsa naTsema bakha sipinishi badla  
kamnandzi nemndeni wabo.

Bapha nabomakhelwane.



Labafana bajabulile.

Tsemba wabonga Letsa ngalolwati lamnike Iona. Futsi wacala kufundza nekwenta lucwaningo ngetibhidvo letahlukene kanye netitselo.

Tsemba waba ngumngani  
wemtapomabhuku.

